

# INUIT ATAQATIGIT

INATSISARTUNI



18. februar 2016

UPA 2016/122

Inatsisartut suleriaasianni § 33 naapertorlugu aaliangiiffigisassatut siunnersuut imaattoq matumuuna saqqummiuppar:

**Matumuuna Inatsisartut aalajangiiffigisassaannik siunnersuuteqarpunga, Naalakkersuisut peqquneqassasut kingusinnerpaamik juni 2016-p ingerlanerani Inatsisartuni partit isumaqtigiainniareerlugit saqqummiutissagaat, innuttaasut inuunermut ulorianateqarsinnaasunik nappaateqartunut ilaquaasut 2017-miit danmarkimi napparsimasut angerlarsimaffianni akeqanngitsumik najugaqarsin-naanissaannut aqqutissiuussissallutik.**

(Inatsisartunut ilaasortaq Mimi Karlsen, Inuit Ataqatigit)

## Tunngavilersuut:

Siunnersuut manna Danmarkimi kalaallit suliaritikkiartornerminnut atatillugu najugaqarfigisartagaannut tunngassuteqartuuvoq, taamaasilluni innuttaasunut napparsimaruluttunut inuunerminnillu ulorianartorsiuuteqartunut tassani akeqanngitsumik najugaqartinneqartarsin-naasarnissaat aqqutissiuuneqaqqullugu. Inuunermut ulorianateqartumik nappaateqarluni suliaritikkiartortumut misigisaq oqimaatsuuvoq nappaatip atugarliuutigisap suliaritikkiartus-sutignerani nunarput qimallugu angalasariaqarneq, tamatumanilu kisimiilluni inuunermik ulorianartorsiortumik aniguiniarluni akiuunniarnermi ilaquaasumik sanilerisaqarnissaq, taassumangna tuppallersarnissaq, tapersorsorneqarnissaq isumagineqarnissartillu. Tamatumanimi naammattuaannanngimmat napparsimavimmi sulisuuusunit kisiat isumagineqartarneq.

Nappaat inuunermut ulorianartorsiuffiusup anigorniarnerani pingaaruteqartuuvoq ilaquaasunit qanilaarfingineqarlunilu paaqqutarineqarnissaq. Tamanna napparsimavinni nakorsat suliarisaan-nut pingaaruteqartutulli pingaaruteqarluinnartuuvoq.

Napparsimasut najugaqarfigisaanni ilaquaasut napparsimasup najugaqarfigisaanni pulaartorneqarsinnaasarput. Tassani issiavissuaqarpoq pisariaqartutigut aamma siniffittut atorneqarsinnaasoq. Napparsimasup aammalu taassumap ilaqutarisai periarfissaqartarput nerisassiulaarnissamut, tamatumali saniatigut akiliillutik napparsimasut najugaqarfiata nerisarfiani neriartorsinnaallutik. Najugaqarfigineqartartut inissatigut killilimmik periarfissa-qarput, tassami aamma piffissani assigiinngitsuni nappaateqarlutik uninngasut amerlasin-naasarmata, taamaattumillu matumuuna siunnersuuteqarnermi siunertarineqarani, napparsimasut ilaqtuttaminik najugaqartitsissarsinnaasarnissaat aqqutissiuunnianeqassasoq. Tamatumani perululluni nappaateqartumut ilaquaasoq ataatsip najugaqartinneqarsinnaa-nissamut salliutinnejartariaqarluni. Taamaattorli pissusissamisoortuuvoq maleruagassanik tamanit paasuminartunik suliaqarnissaq, tamannalu peqqissaaveqarfiup isumagisinnaassavaa.

Naalakkersuisut siunnersuut imatut paassisangilaat, ilaquaasut suli amerlanerusut aammalu maleruagassaaareersut saniatigut pilersilluni matumani periarfissiisoqartalernissaanik aqqutissiuussisoqartoqarniartoq. Siunnersuut imatut paasineqassaaq, innuttaasut inuunerminnik ulorianartorsiortutik nappaateqartut, kisiannili assersuutigalugu kræftertutik, uummallullutik il.il., nappaateqarnermikkullu annertuumik ulorianartorsiuuteqarnermikkut eqqarsartariaatsikkut tatisimaneqartorujussuit, taamaattumillu ilaquaasunit eqqaminniitto-qarnissaanik pisariaqartitsisut aamma periarfissinneqarnissaat ilaqtarisaminnik akeqanngitsumik najugaqateqarsinnaanissamut. Matumani pineqanngilaq angalanermi akiliunneqarnissaq, nutserussunneqartarnissaq piffimmiluunniit angalasariaqartarnerni il.il.

isumagineqartarnissaq. Matumanit pineqartoq tassatuaavoq qanigisap eqqaaniisinnaanissaq siunertaralugu akeqanngitsumik najugaqatiginnissinnaasarnissaq.

Neriutigalugu siunnersuutigisannik tapaserneqarsinnaanissaq, ammafigivara politikkikkut paaseqatiginnitqarnissaa siunertaralugu pisortat akiligaannik, napparsimarluttumut qanigisaasup arlaata akeqanngitsumik najugaqartinneqarsinnaanissaanut ammaassisognissaa siunertaralugu isumaqatigiinniartoqassasoq.

UPA 2015-mi siunnersuuteqarnikuuvunga napparsimasumut qanigisaasup napparsimasut angerlarsimaffianni najugaqartitsisoqartarsinnaanissaanut atatillugu. Tamannali atortussangortinneqanngitsoorpoq Naalakkersuisut suna toqqammavigissanerlugu periarfissamik nassaarsinnaasimanninnerat pissutigalugu. Taamaattumik matumuuna siunnersuutigaara 2016-mi junip qaammataani Naalakkersuisut partiit sinnisaannik isumaqatiginniniareersimassasut anguniarlugu, innuttaasup inuunerminik ulorianartorsi-uuteqarluni suliaritikkiartortup 2017-miit ilaquaasumit ataatsimit akeqanngitsumik kalaallit napparsimasut utaqqiisaanik uninngavigisartagaanni najugaqateqarsinnaalernissaa aqutissiuuneqassasoq.

### **Pisortanut aningaasatigut allaffissornikkullu kingunerisassai**

Aningaasatigut allaffissornikkullu pisortat aningaasartuutigisassai naatsorsuutigineqarpoq ukiumut 1,2 mio.kr.-nik annertussuseqassasut. Najugaqarnermi aningaasartuutaasussat saniatigut, tamatuma saniatigut allaffissornikkut aningaasartuuteqartoqarumaarpoq, soorlu aqutsineq eqqarsaatigalugu il.il. aningaasartuutinut. Tamanna AC-tut atorfillip affaanit annertunerunavianngilaq, taamaattumillu ingerlatsinermut aningaasartuutaareersut ilassuteqartinngikkaluarlugit isumagineqarsinnaajumaarluni.

Aningaasat taaneqartut nikingasinnaapput, tassami ilaquaasut ineqarlutik nerisaqarlitillu akiliutaat aallaavigalugit taaneqarmata. Naalakkersuisut partinut isumaqatiginninnialerunik kisitsisnik eqqornerusunik piniaqqaarsinnaammata, taamaalillutillu aningaasartuutissat eqqornerusut tunngavissaassallutik

### **Namminersorluni inuussutissarsiuteqarnermut aningaasatigut allaffissornikkullu kingunerisassat.**

Soqanngilaq

### **Innuttaasunut aningaasatigut allaffissornikkullu kingunerisassat.**

Soqanngilaq